


AWIG-AWIG

DESA ADAT BANJAR BENGKEL



**DESA ADAT BANJAR BENGKEL
KEPERBEKELAN DESA ANTOSARI
KECAMATAN SELEMADEG
KABUPATEN DAERAH TINGKAT II TABANAN**

AWIG-AWIG

DESA ADAT BANJAR BENGKEL

MANGGALA

SARGA I ARAN LAN WEWIDANGAN DESA

SARGA II PATITIS LAN PAMIKUKUH

SARGA III SUKERTA TATA PAKRAMAN

- Palet 1 Indik Krama.
- Palet 2 Indik Prajuru.
- Palet 3 Indik Kulkul.
- Palet 4 Indik Paruman.
- Palet 5 Indik Druwen Desa.
- Palet 6 Indik Sukerta Pamitegep.
- Kaping 1 Karang, Tegal, lan Carik.
- Kaping 2 Papayonan.
- Kaping 3 Wewangunan.
- Kaping 4 Wewalungan.
- Kaping 5 Bhaya lan Dusta.
- Kaping 6 Panyanggran Banjar.

ARGA IV SUKERTA TATA AGAMA

- Palet 1 Indik Dewa Yadnya.
- Palet 2 Indik Rsi Yadnya.
- Palet 3 Indik Pitra Yadnya.
- Palet 4 Indik Manusa Yadnya.
- Palet 5 Indik Bhuta Yadnya.

ARGA V SUKERTA TATA PAWONGAN

- Palet 1 Indik Pawiwahan.

Palet 2 Indik Nyapian.
Palet 3 Indik Sentana.
Palet 4 Indik Warisan.

RGa VI WICARA LAN PAMIDANDA

Palet 1 Indik Wicara.
Palet 2 Indik Pamidanda.

RGa VII NGUWAH-NGUWUHIN AWIG-AWIG

RGa VIII PAMUPUT

MANGGALA

OM SWASTIASTU

Om Awighnamastu Nama Sidhan,
Krama Desa Adat Banjar Bengkel, Desa Antosari, Kecamatan
Selemadeg, Kabupaten Daerah Tingkat II Tabanan, ngawentenang
Paruman jangkep ring Rahina Redite, Wuku Krulut Icaka warsa
1917, pananggalan Masehi 9 Juli 1995, magenah ring Desa Adat
Banjar Bengkel.

Malarapan manah suci nirmala miwah asung wara nugraha Ida
Sang Hyang Widhi, majalaran parasparopasarpanaya segilik se-
guluk, selunglung sabayantaka mutusang Awig-Awig Desa Adat
Banjar Bengkel maka sepat siku-siku pamatut, wastu kasidan
tatujon warga sareng sami ngidep midabdabang tur ngamanggeh-
ang kadi sane kaucap tur kasurat ring awig-awig.

Murdaning pamikukuh Awig-Awig puniki manut dresta-dresta sane
kantun munggah ring wawidangan Desa Adat Banjar Bengkel
pamekas pamikukuh lan patitis Pancasila, Undang-Undang Dasar
Republik Indonesia warsa 1945, tan maren manggeh kainggilang
mawastu metu awig-awig sakadi kasurat ring sor puniki.

Om Santi, Santi, Santi, Om.

SARGA I
ARAN LAN WEWIDANGAN DESA

Pawos 1.

1. Desa Adat puniki mawasta Desa Adat Banjar Bengkel.
2. Jebar kakuwub wewidangannyane mawates nyatur desa :
 - Sisi Kaler : Desa Adat Lumbung.
 - Sisi Kangin : Tukad Payan.
 - Sisi Kelod : Desa Adat Antosari.
 - Sisi Kauh : Tukad Tireman.
3. Desa Adat puniki ngemponin kalih nyungsung Tri Kahyang-an sane magenah ring Banjar Bengkel Dajan Rurung lan Banjar Bengkel Delod Rurung, inggih punika Pura Puseh, Pura Desa/Bale Agung, Pura Dalem, lan taler ngempon Pura Dukuh Sakti magenah ring Banjar Bengkel Delod Rurung.

Pawos 2.

1. Desa Adat Banjar Bengkel kepah dados tigang banjar, inggih punika :
 - a. Banjar Bengkel Dajan Rurung.
 - b. Banjar Bengkel Delod Rurung.
 - c. Banjar Tireman.
2. Wates palemahan wewidangan banjar kamanggehang antuk pararem desa.
3. Banjar wenang kepah dados tempekan manut pararem banjar.

SARGA II
PETITIS LAN PEMIKUKUH

Pawos 3.

Desa Adat Banjar Bengkel ngamanggehang pamikukuh minakadi :

1. Pancasila.
2. Undang-Undang Dasar Republik Indonesia warsa 1945.
3. Tri Hita Karana manut sada cara Agama Hindu.

Pawos 4.

Luir patitis Desa Adat Banjar Bengkel :

1. Mikukuh miwah ngrajegang Agama Hindu antuk stitibakti ring Ida Sang Hyang Widhi Wasa.
2. Nginggilang tata prawertine magama.
3. Ngrajegang kasukertan desa saha pawongannyane sakala lawan niskala.

SARGA III
SUKERTA TATA PAKRAMAN

PALET 1
INDIK KRAMA

Pawos 5.

1. Krama Desa Adat Banjar Bengkel inggih punika kulawarga sane magama Hindu, jenek mapaumahan ring wewidangan Desa Adat Banjar Bengkel tur nyungkemin Tri Kayangan.
2. Sajabaning punika sinanggeh tamiu.

Pawos 6.

1. Krama Desa Adat Banjar Bengkel kabinayang kalih soroh inggih punika krama sane ngemong Palemahan Karang Desa

lan krama sane tan ngemong Palemahan karang Desa.

2. Sahananing warga Desa sane sampun anom, truna miwah deha soang-soang kapupulang ring Sekeha Truna-Truni sane kapatutang wenten ring banjar kasungkemin antuk Desa Adat.

Pawos 7.

1. Kulawarga sane magama Hindu wiwitan warga desa tiosan dados ngranjing makrama desa ring Desa Adat Banjar Bengkel nanging patut jenek mapaumahan ring wewidangan Desa Adat Banjar Bengkel.
2. Sang kadi ngranjing ring ajeng atur upeksa ring Bendesa Adat kadulurin antuk tategenan makrama manut pararem.

Pawos 8.

1. Sinalih tunggil warga desa mawiwit makrama desa sangka-ning pawiwahan.
2. Ngawit tedun makrama desa sakadi ring ajeng prade sampun pawiwahan ipun wenten tigang sasih.

Pawos 9.

1. Sahananing krama desa, sani keni ayahan, minakadi, ayahan ngarep, ayahan balu, manut pararem.
- ② Krama desa sane sampun wenten sentanannyane mawiwaha patut kaselidihiin olih sentanannyane inucap.

Pawos 10.

1. Swadarmaning krama desa, inggih punika ;

- a. Satinut ring daging awig-awig miwah pararem-pararem.
 - b. Natak panes tis kertin desa.
2. Anak sane sinanggeh tamiu patut tinut ring tetiwak desa indik ngupadi sukertan desane ring sakala.

Pawos 11.

1. Krama desa wenang polih pangayoman desa manut dresta nganinin :
- a. Sangaskara kauripannyane sane mabuat, sane mastika-
yang iketan sulur pakulawargan.
 - b. Kasukertan miwah kasucian dewek, parahyangan miwah
karangnyane.
 - c. Kasukertan druwenyane soang-soang.
2. Krama desa kengin mapuangkid, nutug ayahan antuk artha brana riantukan makarya ring dura desa manut pararem. ✓

Pawos 12.

1. Krama desa sane nampi tamiu jantos makolem mangda masadok ring Prajuru/Klihan Adat.
2. Prade tamiu ring ajeng madunungan jantos asasih Prajuru/Kelihan Adat patut nureksa maka pabuatnyane miwah ilikita-ilikitanyane, yening tan manut tamiu punika patut kawaliang.
3. Sang nampi tamiu punika yan tan masadok sakadi ring ajeng, patut keni danda manut pararem.
4. Sinalih tunggil warga desa tan kapatutang ngajak anak istri tuna susila ngranjing miwah ngrerap ring sawidangan Desa Adat Banjar Bengkel, sapa sira piwal keni danda manut pararem.

Pawos 13.

1. Sinalih tunggil wusan makrama desa riantukan sakadi ring sor :
 - a. pinunas ngraga,
 - b. kanorayang antuk desa.
2. Sang wusan makrama Desa tan polih pah-pahan druwen desa miwah banjar.
3. Sang wusan makrama desa kengin malih makrama desa manut pararem.

**PALET 2
INDIK PRAJURU**

Pawos 14. ok

1. Desa Adat Banjar Bengkel kaenter antuk Bendesa Adat.
2. Banjar kaenter antuk Kelihan Adat.
3. Bendesa lan Kelihan Adat patut :
 - a. Mawiwit saking krama ngarep.
 - b. Kaadegang malarapan antuk pamilihan saking paruman krama desa adat nyabran 3 (tigang) warsa apisan, sajawaning wenten pariindik sane mabuat/tios.
 - c. Maduluran atur uningayang ring Pura Desa/Bale Agung.

Pawos 15.

1. Bendesa Adat lan Kelihan Adat kasanggara antuk :
 - a. Panyarikan pinaka juru surat.
 - b. Patengen pinaka pangemong druwen desa.

- c. Kasinoman pinaka juru arah.
 - d. Pacalang pinaka patelik sukertan krama desa.
2. Sajeroning ngenterang sukertan niskala Bendesa Adat masinggihang pamangku Kahyangan Desa.

Pawos 16.

1. Swadarmaning Bendesa Adat, luwire :
 - a. Ngenterang palaksanaan sadaging awig-awig miwah pararem desa.
 - b. Nuntun tur ngenterang krama rawuhing warga desa ngupadi antuk patitis.
 - c. Mawosang kalih niwakang pamutus arep ring wicara warga desa.
 - d. Maka duta matemuang bawos ring sapasira ugi.
2. Prade prajuru iwang malaksana keni pamidanda manut pararem.

Pawos 17.

Petias utawi olih-olihan Prajuru/Desa lan Prajuru Banjar manut pararem.

Pawos 18.

- Prajuru Desa utawi Banjar kagentosin riantukan :
- a. Seda/padem,
 - b. Tutug panemaya,
 - c. Wit saking pakayun utawi pinunas ngraga,
 - d. Kanorayang duaning iwang mamargi manawi nilar sasana.

PALET 3
INDIK KULKUL

Pawos 19.

1. Kulkul ring Desa, luire :
 - a. Kulkul Desa.
 - b. Kulkul Banjar.
 - c. Kulkul sekeha-sekeha.
2. Kulkul Desa miwah Banjar patut katepak manut kadi daging awig-awig puniki anggen tetenger sane patut katiwakang ring warga Desa sami.
3. Suaran kulkul Desa utawi Banjar nganggen tetengeran sakadi ring sor :
 - a. Atuludan lambat tengeran tedun ngayah wiadin paruman.
 - b. Atuludan bulus tengeran wenten kapanca bhayan.
 - c. Kulkul nguntit tengeran wenten geni baya.
 - ✓d. Kalih atuludan lambat ping tiga tengeran pawiwahan.
 - e. Tigang kelentungan lambat tengeran kalayu sekar.

Pawos 20.

1. Kulkul Desa utawi Banjar tan wenang katepak yening tan sangkaning pituduh Prajuru Desa utawi Banjar, sajawaning tetengeran kapanca bhayan.
2. Sang nepak sakadi ring ajeng keni danda manut pararem.
3. Kulkul sekeha-sekeha tan kalugra nyawerin (matehin) sukat utawi tengeran kulkul Desa/Banjar, prade mamurug keni danda manut pararem.

Pawos 21.

1. Prade wenten kapanca bhayan kulkul Desa utawi Banjar wenang katepak tan nyantosang pituduh Prajuru Desa/ Banjar.
2. Sahananing kulkul Banjar sawidangan Desa Adat Banjar Bengkel puniki patut nyarengin katepak prade wenten sinalih tunggil kulkul Banjar wiadin kulkul Desa nyihnayang wenten kapancabhayan.
3. Sahananing krama rawuhing truna patut nedunin saha magegawan mapitulung manut rupan bhayane.

PALET 4
INDIK PARUMAN

Pawos 22.

1. Paruman sane wenten ring Desa, luire :
 - a. Paruman Desa.
 - b. Paruman Prajuru.
 - c. Paruman Banjar.
 - d. Paruman saluiring sekeha-sekeha.
2. Sahananing paruman presida kalaksanayang yening sampun karawuhin antuk kalih pah tiga ring sang patut nyarengin, majalaran suaran kulkul saha abusana adat.
3. Sahananing paruman mangda kariyinin antuk atur piuning ring Ida Begawan Penyarikan maka serana Widi Widana Cane.
4. Pamuput bawos kautsahayang pisan mangda malarapan antuk paras paros mawetu suara sagilik saguluk, utawi beriyuk sapanggul, nanging yan tan presida suara

makehan sinanggeh pamutus.

Pawos 23.

1. Paruman Desa utawi Banjar kawentenang sanistane enam sasih apisan.
2. Paruman Banjar kawentenang tigang sasih apisan.
3. Paruman Prajuru kawentenang asasih apisan.
4. Luwir paruman sakadi ring ajeng taler kawentenang paruman dadakan manut wigunan/tetujon.

Pawos 24.

1. Sajeroning paruman Desa, Bendesa Adat patut nyiarang pamargin ngenterang Desa, pamekas nganinin indik :
 - a. Munjuk lungsuring pakraman saha ayah-ayahan, sulur artha brana, druwen desa.
 - b. Rencana Prajuru nganinin usaha Desa kapungkur.
2. Pamutus paruman Desa sinanggeh pararem maka mapitegep palaksanaan awig-awig.

Pawos 25.

1. Sangkepan Prajuru Desa kawenangang wantah ngarincikang pangerencana usaha Desa kapungkur.
2. Sangkepan Prajuru Desa tan kawenangang ngawedalang tategenan ring Krama Desa sadereng kaingkupin antuk Krama Desa.
3. Sangkepan Prajuru Desa wantah ngawentenang pasuwara maka pidaging pituduh sang ngawewenang utawi ngonekang pecak

pararem krama desa.

Pawos 26.

1. Paruman Banjar wenang ngardi pararem-pararem, tan kapa - tutang pararem-pararem punika matungkas tur lempas ring awig-awig Desa Adat Banjar Bengkel.
2. Pararem-pararem Banjar sakadi ring ajeng, saha kalingga tanganin olih Bendesa Adat maka pamikukuh dumugi dados kalaksanayang.

PALET 5
INDIK DRUWEN DESA

Pawos 27.

Padruwen Desa Adat Banjar Bengkel, sakadi ring sor :

1. Kahyangan tiga minakadi Pura Puseh, Pura Desa/Bale - Agung, Pura Dalem.
2. Pura Duku Sakti.
3. Palemahan karang desa.
4. Wewangunan minakadi Bale Desa, Bale Banjar.
5. Tanah palaba pura.
6. Lelanguan minakadi Gong.
7. Tanah Setra.

Pawos 28.

Piolihi-olihi Desa Adat Banjar Bengkel, luire :

1. Piolihi-olihi saking tanah setra utawi tanah Pelaba Pura
2. Urunan Krama Desa.
3. Paweh saking pamrentah.
4. Paweh-weh marupa dana punia sane patut.

PALET 6
INDIK SUKERTA PAMITEGEP

KAPING 1
INDIK KARANG, TEGAL LAN CARIK

Pawos 29.

1. Palemahan karang desa druwen Desa Adat Banjar Bengkel magenah ring Banjar Adat Banjar Bengkel Dajan Rurung lan Banjar Bengkel Delod Rurung.
2. Prajuru/Bendesa Adat wenang nabdab pariindikan palemahan karang desa punika manut pararem.
3. Prade Krama desa sane ngemong palemahan karang desa punika camput, wusan makrama desa utawi ninggal sasana-ning agama Hindu, patut palemahan karang desa punika mawali ke desa.

Pawos 30.

1. Sahananing Karang paumahan kapatutang :
 - a. Pastika wenten wates ipun.
 - b. Mapamedalan kamargi utawi rurung tan dados kabe - beng.
2. Prajuru/Bendesa Adat patut ngutsahayang mangda pakara-ngannyane sakadi ring ajeng kawentenannyane.

Pawos 31.

1. Sahananing Krama Desa patut ngawatesin pakarangannyane soang-soang jantos sida trepti nyatur desa.

2. Wates sane marep ka margine patut katembok wiadin kapa-gehin olih sang madruwe karang.
3. Prade pakarangan punika wenten tlajakannyane tlajakan punika patut kapiara olih sang madruwe karang.

Pawos 32.

1. Sinalih tunggil krama desa tan kalugra :
 - a. Ngalah-alah margi, karang paumahan, tegal, carik lan sakancanipun.
 - b. Ngalah-alah tegak kayangan lan sakancan tegak sinang-geh suci.
2. Prade wenten sakadi ring ajeng sang nglahlah punika kasisipang tur keni danda manut pararem, saha patut nge-waliang tanah inucap kadulurin upakara ring pangelahlah tanah suci.

Pawos 33.

1. Tan kawenangang ngenahang barang sane ngaletehin karang paumahan bilih-bilih yan kaletelahannyane nglantur sinang-geh nglimbak ngletehin desa manut agama.
2. Sapa sira ugi malaksana sakadi ring ajeng, keni artha lan dewa danda manut pararem.

Pawos 34.

1. Sahananing tanah tegal utawi tanah carik padruweyan ngraga patut wenten pastika wates ipun.
2. Sang madruwe tanah tegal utawi tanah carik ring ajeng patut becik miara kawentenan watesnyane sisi kangin

miwah sisi kaja sangkaning tanah tegal lan carik punika mawasta magegaleng kaluan.

3. Prade wenten biota indik wates tanah tegal lan tanah carik ring ajeng, Prajuru/Bendesa Adat lan Prajuru Subak wenang pacang matutang.

Pawos 35.

1. Yan wenten anak padem ring tegal wiadin carik anak lian ring tanah punika patut kalaksanayang widi widana manut agama kaprebeya olih sang madruwe sawa.
2. Ngentasang sawa ring tegal wiadin carik anak lian kapa-
tutang manut pituduh Prajuru/Bendesa Adat miwah Prajuru Subak.
3. Tanah sane kamarginin patut kaprayascita olih sang ma-
druwe sawa tur prayascita punika kamargiang ring tanah
sane kentsin pinih riin, tanah-tanah sane kentsin
pungkuran patut kasiratin kewanten antuk tirta pamrayas-
cita punika.

**KAPING 2
PAPAYONAN**

Pawos 36.

Krama desa kapatutang ngamanggehang kawerdian tanem tuwuh
sane ngawenang desane asri tur lestari.

Pawos 37.

1. Ngawit nandur papayonan tanem tuwuh patut adepa agung
ngajeroang saking wates, prade jantos ngliwatin wates
patut kasepat gantungin.

2. Tetabuhan sane ngungkulin, samaliha mawastu mayanin kapisaga patut kawara antuk paigum ping ajeng presida sang nruwenang wit ngebah utawi notor.

3. Prade sampun kawara taler tan wenten usaha sang nruwenang wit punika, sang rumasa katetehan/kajerihan wenang masadok ring Prajuru/Kelihan Adat, tur risampun kaparitas kalugra ngicalang wit inucap, sakewanten patin payonan punika patut katawur manut panglokika sane nepasin.

4. Sang keni pamidanda panyanggaskara saha prebea manut pararem arep ring wewangunan sang karubuhin, luire :

- a. Sang nruwenang wit sinanggeh mayanin prade pungkut ngarubuhin wewangunan krama tios.
- b. Sang notor, munggul utawi ngebah taru tur ngarubuhin wewangunan krama tios.

KAPING 3 WEWANGUNAN

Pawos 38.

1. Nyabran ngwangun patut :

- a. Masadok ring prajuru desa adat/banjar, ping ajeng prade wewangunan nganinin wates.
- b. Tan ngungkulin raab pawangunan napi luwir ngalintang wates kakuasaan anak tios.
- c. Patut ngangge asta bhumi miwah gagulak asta kosala kosali, sanistane manut ring patitis niskala.

2. Prade wewangunan jantos nyayubin, bilih-bilih temboke ring telenging wates, wiadin ngliwatin wates tur ngangen kakuasaan anak tios, risampun kawara tur kasadokang

ring prajuru wenang kadanda manut pararem saha tembok inucap kagubar utawi sanistane mangda kakaryanang abangan.

Pawos 39.

1. Tan kapatutang :
 - a: Ngembahang toya saking badan wewalungan/pasiraman, pawaregan, miwah sane tiosan, sane ngawetuang ambu kaon kapakarangan anak lian wiadin kamargine, sawanin toyan sabeh.
 - b: Ngentungang luu kapakarangan lian wiadin kamargine.
2. Sapa sira ugi sane piwal sakadi ring ajeng kadanda manut pararem.

**KAPING 4
WEWALUNGAN**

Pawos 40.

1. Sahanan warga desa sane miara wewalungan (bawi risampun mabelas, utawi banteng saluwir ipun sampun masaluk tali) patut sayaga nitenin negul/ngalogorin mangda tan ngrucak karang utawi pabianan krama sewosan, bilih-bilih mangda sampun jantos ngletehin kahyangan.
2. Prade wenten pastika wewalungan malumbar utawi ngeleb ngrusakin pakarangan/pabianan krama sewosan, keni danda manut pararem.

Pawos 41.

1. Warga Desa Adat Banjar Bengkel patut nyanggra wewalungan miwah sarwaprani sane mawiguna kabuatan urip.

2. Sapa sira tan manut sakadi ring ajeng keni danda manut pararem.

KAPING 5
INDIK BHAYA LAN DUSTA

Pawos 42.

1. Pariindik bhaya, luire : jiwa bhaya, artha bhaya. (kandungan) dura cara ring agama.
2. Prade ring desa kahanan jiwa bhaya, patut desane ngaturang bhuta yadnya, tur sang mayanin katur ring sang ngawewenang.
3. Sang manggihin kahanan jiwa bhaya, patut nepak kulkul mapitulung anut pawos 19 (3).

Pawos 43.

1. Sang manggihin kahanan artha bhaya, patut nepak kulkul mapitulung anut ring pawos 19 (3), utawi sang kamalingan atur upeksa ring prajuru sane pacang nimbangin utawi nandanin anut uger-uger jagat saha mawuwuh panyangas-kara prade wenten jadma ngamaling barang sinanggeh suci.
2. Pratingkahe mapilon ring dusta kabawos saruron, sang pastika mapilon ring dusta keni danda manut paparem.

Pawos 44.

1. Sahanan krama desa prade polih nuduk barang sakeluire ring wewidangan Desa Adat Banjar Bengkel patut atur uning ring prajuru/Kelian Adat.
2. Prajuru/Kelihan Adat nyiarang barang dedudukan punika mangda sang madruwe sida mawantun ngamolihang barang nyane.
3. Sang mariangkenang patut prasida nyihnayang mungguwing barang punika maka jati druwenyane.
4. Prade jantos tigang sasih tan wenten jadma ngelingin wenang kadruweyang antuk sang nuduk.

**KAPING 6
PANYANGGRAN BANJAR**

Pawos 45.

1. Krama banjar sajebag Desa Adat Banjar Bengkel patut nyanggra pakaryan suka duka kramannyane soang-soang jantos puput.
2. Tata cara panyanggran inucap, manut kabuatan sang madruwe karya, tur kasulurang manut pararem.
3. Sang tungkas ring pidabdab ring ajeng keni danda manut pararem.

SARGA IV
SUKERTA TATA AGAMA

PALET 1 ✱
INDIK DEWA YADNYA

Pawos 46.

1. Palinggih Panyiwian wewidangan Desa Adat Banjar Bengkel luire :
 - a. Tri Kahyangan : Pura Puseh, Pura Desa/Bale Agung, Pura Dalem.
 - b. Pura Dukuh Sakti.
2. Rahina piodalan soang-soang kahyangan inucap, kadi ring sor :
 - a. Pura Puseh, rikala Buda Umanis, wuku Prangbakat.
 - b. Pura Desa/Bale Agung, rikala Buda Umanis wuku Perangbakat.
 - c. Pura Dalem, rikala Tilem Ke-Dasa.
 - d. Pura Dukuh Sakti, rikala Buda Keliwon wuku Sinta.
3. Pangaci ring pura inucap manut kecap sastra agama, saha kalaksanayang nista, madia, utama, nganut ring kawenten lan pararem.
4. Desa Adat Banjar Bengkel taler ngempon Dang Kahyangan Pura Srijong sareng Desa Adat lianan.

Pawos 47. ✱

1. Ring soang-soang pura inucap kawentenang pamangku.
2. Ngadegang pamangku nganut dudonan :
 - a. Saking turunan.

- b. Nunas pawuwus Widhi/Nyanjan.
 - c. Kacatri/Pilihan krama Desa Adat.
3. Tan wenang dados pamangku luire, :
 - a. Ceda angga, luire ; peceng, perot, cungh, lan sape-nunggalannya.
 - b. Sakit ila, buduh, ayan.
 - c. Sane madruwe kasucian hidup tan becik.
 4. Adhiksa Widhi (pawintenan) pamangku, prebea lan upakara kamedalin tur kalaksanayang antuk Desa Adat.

Pawos 48.

- ① Turunan pamangku saking purusa dados panyade pamangku.
2. Ngawentenang panyade pamangku saking lianan turunan manut kabuatan kalih pararem.

Pawos 49.

Sinalih tunggil pamangku ring kahyangan kapiambeng, pangacine dados kamargiang antuk pamangku sane tan kapiambeng, minakadi :

1. Panyade.
2. Pamangku-pamangku sane siosan.
3. Pamangku sane kasenggulang sumaih ring pamangku Tri Kahyangan tur katitenin olih Bendesa Adat.

Pawos 50.

1. Pamangku patut ngamanggehang sasananing pamangku.
2. Swadarmaning pamangku luire :
 - a. Ngenterang upacara piodalan ring kahyangan utawi ring soang-soang paumahan krama.

- b. Tan wenang salab-sulub, ring genah sinanggeh leteh,
yan mamurug wenang mangku inucap nyepuhin raga.
- c. ✓ Makersih-bersih ring kahyangan.

3. Riwekas ring sedane pamangku, Desa Adat maweh dana
atiwa-atiwa manut pararem.

Pawos 51.

1. Pamangku kagentosin riantukan :
 - a. Seda.
 - b. Pinunas ngraga, manawi kageringan lan sapenunggalan-
nyane.
 - c. Kawusang antuk krama manawi malaksana sane tan patut
(asta dusta).
2. Prade pamangku kawusang sangkaning malaksana asta dusta,
patut keni pamidanda manut pararem.

Pawos 52.

Patias utawi olih-oliu pamangku luire :

- 1. Sarin canang aturan krama desa.
- 2. Luput pakaryan (ayah-ayahan) miwah reramon.

Pawos 53.

Kasukertan Kahyangan kadi ring sor :

1. Tan kalugra ngranjing ka pura luire ;
 - a. Sang katiben cuntaka.
 - b. Makta sahanan barang sinanggeh ngletehin.
 - c. Malaksana tan patut (tan manut) kadi tata caraning
ngranjing ka pura.
 - d. Sato agung, sajawaning rikala mapepada.

2. Pratingkahe tan wenang ring pura :
 - a. Masumpah (cor), sajawaning pituduh prajuru.
 - b. Makolem dados asiki lanang wadon.
 - c. Mungguh-tedun palinggih sajawaning pituduh prajuru.
 - d. Mabacin.
 - e. Mawarih.
 - f. Mecikang wastra.
 - g. Ngambahang rambut.
 - h. Mayuda.
 - i. Masanggama.
3. Sang mamurug kecaping ajeng, keni artha lan dewa danda manut pararem.

Pawos 54.

1. Prajuru/Bendesa Adat patut nuntun ngenterang krama desa ngamanggehang kasucian kahyangan desa.
2. Prade kahyangan kahanan durmengala, minakadi kapanca - bhaya pamangku patut digelis nyadokang ring Prajuru/Bendesa Adat tur ngawentenang pamarayascita sapatutnyane.

**PALET 2
INDIK RSI YADNYA.**

Pawos 55.

1. Sang pacang madeg pandita utawi pinandita minakadi bali-an conteng, dalang, saluire ngenterang yadnya patut masadok ring Prajuru Desa kalih Parisada Hindu Dharma.
2. Prajuru patut sareng nyaksiang upacara saha nyiarang ring paruman desa tegap rauhing wates kawenangan pangen-ter yadnya.

Pawos 56.

1. Sang sulinggih utawi pamangku patut ngriyining muput yadnya ring wewidangan jagat Desa Adat Banjar Bengkel sasampune wawu kapatut muputang yadnya kajebar jagat tiosan utawi kadura desa.
2. Krama desa sami patut sareng ngawas nitenin katuntun antuk prajuru, mangda sahanan yadnya sane kawentenang kaicen pamuput olih pedanda utawi pinandita manut kawenangannyane soang-soang.

PALET 3.

INDIK PITRA YADNYA.

Pawos 57.

1. Desa Adat Banjar Bengkel nitenin sinalih tunggil krama ngalaksanayang pitra yadnya.
2. Pamargin Pitra Yadnya madudonan manut sakadi ring sor :
 - a. Pangupakaran sang kalayu sekar (seda utawi padem) ;
 1. Antuk mendem utawi ngeseng, makacihna pakingsan ring Ibu Pertiwi ring Batara Brahma, salami nutupang prabea.
 2. Atiwa-atiwa (upakara pangabenan/palebon).
 - b. Upakara-upakara Pitra Yadnya riwusan kabenang mawasta munggah daun bingin (ngeroras) wawu kalaksanayang ngalinggihang Dewa Hyang Batara-Batari.

Pawos 58.

Swadarmaning lan tategenan prade wenten sinalih tunggil krama kelayu sekar :

1. Sang kaduhkitan patut ;
 - a. Nyadokang ring Kelian Adat tur nunas tatimbangan ring kawentenannyane.
 - b. Ngaturin banjar ngrombo makarya eteh-ete sawa kadulurin panyembrama canang.
2. Swadarmaning Banjar ;
 - a. Kelian Adat/Prajuru maritatas pamargin sang kaduhkitan napike pacang kapendem, makingsan riin utawi lantur kabenang.
 - b. Prade kapendem, raris kawentenang kulkul pitahu - ring krama adat.
 - c. Panyangran banjar salanturnyane ;
 1. Soang-soang krama banjar nedunin patus, beras, jinah (manut pararem).
 2. Ngrombo ngaryanin eteh-ete sawo saha kasare - ngin antuk krama sane rawuh nyaksiang.
 3. Sami krama banjar ngater ka setra jantos pamen - dem puput.

Pawos 59.

1. Krama Desa Adat, madruwe wewenang tur kuasa ngatur ngamecikang, miara miwah midabdad pamendem ring setra inucap. Pamendeman sawa ring setra tan kadadosang yening nemonin :

- (a) Rahina Purnama, utawi Tilem,
- (b) Anggara Kasih,
- (c) Patoyan Tri Kahyangan,
- (d) Purwani,
- (e) Titibuwuk,
- (f) Semut sadulur, 13 (urip dina)
- (g) Kala Gotongan, 14
- (h) Sandung watang, → Redite sinta.
- (i) Redite Umanis,
- (j) Ngapuanang.

Jawa 23.

2. Rikala sang kalayu sekar nemu rahina-rahina kadi ring ajeng, tan dados makingsan.
3. Sapa sira ugi jagi mendem sang kalayu sekar (sawa) nenten kadadosang nginepang bangbang.

Pawos 60.

1. Tan wenang mendem utawi ngeseng kalayu sekar (sawa) miwah awak-awakan sawa ring karang paumahan.
2. Rare sane durung tumbuh gigi (matuwuh tigang sasih/105 rahina) patut kapendem premangkin ngetangin larangan, wiadin tan patut kabenang, yaning sampun mayusa lintang ring tigang sasih jantos maketus patut kabenang Nglungah.

Pawos 61.

1. Sajeroning bebanjaran, yening jaga mendem sawa lintang ring adiri ring rahina miwah setra tunggal, sane tampekan ring setra patut mamargi riinan.
2. Asapunika taler pamargin palebon ngaben.
3. Yan wenten jadma padem 2 (kalih) diri ring sajeroning bebanjaran, mapendem asiki, matunjel (kageseng) asiki, sane mapendem patut mamargi dumunan tan ngitung doh tampek.
4. Jadma padem nandang sakit ila, sawan ipun patut kapendem ring setra ring genahe sane kapatutang/kapituduhang olih Prajuru Banjar.
5. Sang kalayu sekar (sawa) jadma padem salah pati, wiadin

ngulah pati, dados sawan ipun kapendem sekadi jadma padem biasa sasampun kalaksanayang panebusan. Sadurung kapendem, sawan ipun dados kabakta ngranjing kapaumahan ipun.

Pawos 62.

1. Saluiring gagumuk ring setra sane kabaos ngalikadin olih Prajuru Desa, patut gagumuk punika kagubar olih sang madrebe.
2. Yaning sang madrebe piwal, gagumuk punika dados kagubar olih krama desa.

Pawos 63.

1. Sang kasinanggeh kacuntakan sakadi ring sor :
 - a. Cuntaka antuk kalayu sekar.
 - b. Cuntaka antuk ngraja sewala.
 - c. Cuntaka antuk ngembasang putra. → 42 hari
 - d. Cuntaka antuk kruron.
 - e. Cuntaka antuk pawiwahan.
 - f. Cuntaka antuk sakit ila, buduh.
 - g. Cuntaka antuk gamia gamana.
 - h. Cuntaka antuk mamitra ngalang.
 - i. Cuntaka antuk sad atetayi, → pembunuhan dan kekerasan :
 - j. Cuntaka antuk anak istri mobot tan wenten muaninnya-ne.
f. Cuntaka antuk manusa medemenan ceng binatung
2. Sengker cuntaka sekadi ring sor :
 - a. Cuntaka kalayu sekar, manut sakadi loka dresta miwah sastra dresta ring Desa Adat Banjar Bengkel, cunta-kanyane :
 1. cuntaka bebanjaraan rauhing 3 (tigang) rahina riwusan mendem utawi sasampun polih prayascita (masepuh).

2. Kulawarganyane sajeroning pakarangan ngantos 11 (solas) rahina, utawi sasampun ngalaksanayang prayascita.
3. Sang nyambut karya Pitra Yadnya ngaben (atiwa-tiwa) cuntakanyane ngawit saking ngrancang karya rawuh pamuput yadnyannyane.
4. Krama banjar sane nyanggra pitra yadnya ngaben/atiwa-atiwa cuntakannyane saking ngentenin/ngang - kid rawuh puput yadnyane.
- b. Cuntaka ngraja sewala, cuntakannyane sasuen ngeraja sewala.
- c. Cuntaka ngembasang putra, cuntakannyane 42 rahina (abulan pitung dina), ngawit saking putrane embas, utawi nyantos sampun kaupakara makakambuhan tur maprayascita manut sakadi agama, lanang wiadin istri.
- d. Cuntaka keruron, cuntakannyane abulan pitung dina (42 rahina) tur sampun matirta pamrayascita.
- e. Cuntaka antuk pawiwahan, cuntakannyane ngantos sasampun matirta pabiukaonan.
- f. Cuntaka antuk gamia gamana, cuntakanyane ngantos sasampune kapalasang/masepihan tur sampun kawentenang pamrayascita raga, tur sampun kawentenang pamrayascita Desa/Kahyangan.
- g. Cuntaka mamitra ngalang, cuntakanyane ngantos kawentenang upakara pabiukaonan.
- h. Cuntaka antuk sad atatayi, cuntakanyane ngantos sampun maprayascita raga tur nenten pisan dados ngamung-gahang upakara padwijatian.
- i. Cuntaka anak istri mobot tan wenten muaninnyane cuntakannyane ngantos kawentenang upakara pabiukaonan miwah upakara pamrayascita Desa/Kahyangan.

Pawos 64.

Sane tan kakeniang cuntaka luire :

1. Sang Sulinggih lan Mangku Kahyangan Tiga.

2. Rikala piodalan risampun ngalang sasih/ngalang tengah.

Pawos 65.

1. Atiwa-atiwa (Pangabenan) kalaksanayang antuk :
 - a. Nyawa Resi (Nyuarsa Geni) santukan tan ngagah utawi manawi sawa tan kakeniang.
 - b. Sawa prateka.
2. Panemayan pangabenan wenten kalih pawos ;
 - a. Ngaben dadakan/bah bangun, kadadosang sajeroning tempekan.
 - b. Ngaben ngemasan (ngerit). ✓
3. Dudonan pangabenan ngawit saking ngagah (seda), ngeseng ngantos pangiriman (memukur) utawi nganyut.
4. Sang tungkas ring pidabdab desa keni danda manut pararem.

**PALET 4
INDIK MANUSA YADNYA.**

Pawos 66.

1. Manusa Yadnya inggih punika upacara lan upakara dharma - ning manusa, ngawit saking patemoning kama bang sajero - ning garba ngantos kalayu sekar riwekas.
2. Upakara kadi ajeng madudonan sakadi ring sor :
 - a. Magedong-gedongan duk pangrempinian ibiang.
 - b. duk sang kamareka medal.
 - c. kepus udel.
 - d. roras rahina.

- e. tutug kambuhan (42 rahina).
 - f. nigang sasihin .
 - g. pawetuan/otonan.
 - h. tutug kelih (ngraja swala, ngembakin sane lanang).
 - i. matatah/mepandes.
 - j. mawiwaha.
 - k. mawinten.
3. Upakara-upakara inu'cap nista, madia, utama manut sastra agama saha catur dresta.

PALET 5.
INDIK BHUTA YADNYA

Pawos 67.

- 1. Desa Adat Banjar Bengkel ngalaksanayang bhuta yadnya kabuatan desa.
- 2. Desa Adat Banjar Bengkel nitenin bhuta yadnya kabuatan krama.
- 3. Pamargin bhuta yadnya inucap manut sastra agama nganutang ring drestan desa tur kacumponin olih krama manut pararem.

Pawos 68.

- 1. Bhuta Yadnya inggih punika upacara lan upakara byakala ring pertiwi lan kahyangan, sarwa perani saha upakara-upakara ring bebhutan.
- 2. Upakara Pabhyakala ring sarwa perani luiire :
 - a. Ring sarwa tumuwuh rikala tumpek pangatag (Saniscara Kliwon Wariga).

- b. Ring sarwa ingon-ingon rikala tumpek andang (Sanis - cara Kliwon Uye).
- c. Upacara pekala-kalan manusa anut widana, kabawos pabyakala.
- 3. Upacara pabyakala ring pertiwi, kahyangan lan bebhutan kawastanin macaru.
- 4. Pacaruan inucap ring ajeng nista, madia, utama manut wiguna kadi ring sor :
 - a. Ekasata.
 - b. Panca sanak.
 - c. Tawur agung.
 - d. Panca sata.
 - e. Resi gana.
 - f. Panca kelud.
- 5. Sajabaning kadi ring ajeng kawentenang upakara :
 - a. majot-jotan utawi yadnya nyabran wusan ngrateng.
 - b. Masepuh-sepuh rikala pacang wali ring pura.

Pawos 69.

- 1. Nangken ngawarsa rikalaning Tilem Kasanga kawentenang Tawur Kasanga, ketah kabaos Ngrupuk, makacihna pacang mapag rahina Panyepian benjangnè.
- 2. Upakara panyepian sane kamargiang antuk kerama desa :
 - a. Amati geni.
 - b. Amati karya.
 - c. Amati lelanguan.
 - d. Amati lelungan.

3. Pabratan inucap kamargiang saking semeng rauh semengne benjang.
4. Sang maurung kecaping ajeng keni pamidanda manut pararem, kamargiang olih pacalang desa.
5. Riwus rahina Nyepi (benjangne) maka cihna pangawit Isaka warsa patut soang-soang warga desa sami pada saling ngaksama.
6. Sang tungkas ring pidabdab desa keni danda manut pararem.

SARGA V
SUKERTA TATA PAWONGAN

PALET 1
INDIK PAWIWAHAN

Pawos 70.

1. Desa Adat Banjar Bengkel nitenin sinalih tunggil krama ngalaksanayang pawiwahan.
2. Indik pawiwahan Desa Adat Banjar Bengkel ngamanggehang uger-uger jagat nganutang ring drestan desa tur kacumponin olih krama manut pararem.
3. Tata cara pelaksana pawiwahan manut pararem.

Pawos 71.

1. Pawiwahan inggih punika patemoning lanang istri malara-pan panunggalan kayun suka cita matemu karma kadulurin upasaksi sakala niskala.

2. Sang pacang mawiwaha, patut :

- a. Sampun manggeh deha-truna nganutin undang-undang saking guru wisesa/pamrentah.
- b. Sangkaning pada rena, pada tresna sih kinasih.
- c. Manut kecaping agama.

3. Pawiwahan mangda ngamanggehang sastra agama nganutang ring dresta desa miwah Undang-undang Perkawinan saking pamrentah.

Pawos 72

1. Pawiwahan sane wenten ring desa, inggih punika :

- a. Pawiwahan sane biasa, anak lanang ngambil anak istri kaanggen rabi tur pawiwahannyane kalaksanayang ring jeron sang lanang.
- b. Pawiwahan Nyeburin, anak istri ngambil anak lanang kaanggen rabi tur pawiwahannyane kalaksanayang ring jeron sang istri.

2. Pamargin pawiwahan punika kadulurin antuk papadikan utawi ngerorod.

Pawos 73

1. Pawiwahan sane kapatutang ring desa, sane sampun mamar-gi sakadi ring sor :

- a. Kamargiang pasakapan kasaksiang sakala niskala antuk pandita, pinandita utawi pamangku.
- b. Kasaksi olih Bendesa Adat sane mapekelingang utawi ngilikitayang pawiwahan.
- c. Kasiarang ka desa matengeran suaran kulkul.

2. Pawiwahan inucap ring ajeng kapatutang mangda kacate-
tang ring Kantor Pamrentah sane wenang.

Pawos 74

1. Tan kapatutang anak lanang sane sampun madruwe rabi ma-
lih ngambil rabi yan tan wenten pamutus saking sane we-
nang sane nadosang marabian malih.
2. Taler tan kapatutang balu lanang saking pawiwahan nye-
burin utawi balu istri tan sentana rajeg ngambil rabi
ngalaksanayang pawiwahan ring umah rabin ipun sane
sampun padem punika sadurunge sang balu punika kaperas
anggen sentana olih matuan ipun sane purusa utawi ahli
warisnyane.
3. Prade wenten sane nglaksanayang pawiwahan tan manut sa-
kadi ring ajeng, Bendesa Adat utawi Prajuru Desa lianan
tan kapatutang nyaksiang, tur sang nglaksanayang pawiw-
han punika keni danda manut pararem.

Pawos 75

1. Sapa sira ugi nampi anak ngrorod pramangkin masadok ring
Kelihan Adat sane pacang gelis nureksa sang ngrorod pu-
nika.
2. Yan pamargin sang ngrorod punika sampun nepek ring dres-
ta, patut polih pamikukuh pasayuban banjar.
3. Prade pamargin sang ngrorod tan manut ring dresta, Keli-
han Adat miwah Para Juru Banjar patut gelis melasang
sang keni katetehan kawehin pasayuban ring pakubon Keli-
han Adat tur kautsahayang mitahu kulawargannyane.

4. Sang mamiseka miwah sane nampi sakadi ring ajeng, keni danda manut pararem.

PALET 2
INDIK NYAPIAN

Pawos 76

1. Pawiwahan kawusang malarapan antuk palas marabian utawi silih sinunggil padem.
2. Indik palas marabian, Desa Adat Banjar Bengkel mapagamel ring undang-undang Pamrentah.
3. Sang pastika palas marabian patut masadok ring Bendesa Adat sane pacang nyiarang ring desa, saha keni bean pe - camil manut pararem.
4. Sang tungkas ring pidabdab desa, keni danda manut pararem.

Pawos 77

1. Wusan marabian riantukan salah sinunggil padem mapiteges balu makadi balu lanang utawi balu istri.
2. Balu lanang saking pawiwahan nyeburin utawi balu istri tan sentana rajeg, patut nglaksanayang swadarmaning balu, inggih punika :
 - a. Ngamanggehang pati brata tan kengin ngamargiang drati kerama (para dara).
 - b. Tan matilar saking umah rabin ipun saha ngelaksanayang sane patut kalaksanayang sang balu serahina.

PALET 3
INDIK SENTANA

Pawos 78

1. Desa Adat Banjar Bengkel nitenin sinalih tunggil krama ngadegang sentana.
2. Indik ngadegang sentana Desa Adat Banjar Bengkel, mapagamel ring uger-uger jagat nganutang ring dresta desa tur kapikukuhin olih krama manut pararem.

Pawos 79.

1. Sentana wantah kalih sane kaucap pratisentana miwah sentana paperasan.
2. Pratisentana inggih punika sentana sane metu saking pawiwahan kapatut.
3. Sentana paperasan inggih punika anak lian sane kaidih tur sampun kaperas anggen sentana.

Pawos 80

1. Sentana rajeg inggih punika pratisentana istri sane kamanggehang purusa tur sampun nglaksanayang pawiwahan nyeburin.
2. Sane ngamanggehang sentana rajeg patut masadok ring Kelihan Adat, tur Kelihan Adat patut nyiarang ring banjar saha ngaturang ring Bendesa Adat.

Pawos 81

1. Meras sentana manut dudonan patut makacihna artha brana pamerasan sane kasaksiang sakala niskala.
2. Paperasan sane kapatutang ring desa risampun makacihna widi widana, pamerasan, kasaksiang olih Bendesa Adat sane makelingang utawi ngilikitayang, miwah kasiarang ring wewidangan desane.
3. Sane kapatutang kaperas anggen sentana kautamayang saking pancer kapurusa, prade tan wenten kengin saking wadon, yening taler tan wenten, wawu kengin sakama-kama.
4. Balu lanang saking pawiwahan nyeburin utawi balu istri tan sentana rajeg tan kadadosang meras sentana sadurunge sang balu punika kaperas anggen sentana olih matuanipun sane purusa utawi ahli warisnyane.

Pawos 82

1. Sapa sira ugi pacang meras sentana patut masadok ring Bendesa Adat sanistaning asasih sadurung pamerasan.
2. Bendesa Adat riantuk pasadok ring ajeng, nyiarang ring sawidangan Desa, sang sapa sira ugi rumasa tan lila tur tan cumpu mangda masadok ring Bendesa Adat masengker kalih wuku sadurung pamerasan.
3. Bendesa Adat digelis mawosin saha ngicenin pamutus manut ring catur dresta miwah pararem.
4. Prade sulur paperasan tan manut ring kecaping ajeng Ben-

desa Adat wenang ngandeg pamerasan punika, saha ngicenin pamutus mangde kapatutang riin bebawos sulur utawi wicarannyane.

5. Sang tungkas ring pidabdab desa keni danda manut pararem.

PALET 4 INDIK WARISAN

Pawos 83

1. Desa Adat Banjar Bengkel nitenin sinalih tunggil krama ngindikang warisan.
2. Pariindikan warisan Desa Adat Banjar Bengkel mapagamel ring uger-uger jagat nganutang ring dresta desa tur ka - pikukuhin olih kerama manut pararem.
3. Sang pacang ngindikang warisan patut masadok ring Prajuru/Bendesa Adat.
4. Sapa sira tungkas ring pidabdab desa keni danda manut pararem.

Pawos 84.

1. Warisan inggih punika artha brana saha ayah-ayahan ngu - padi sukerta sakala niskala saking katurunannyane arep ring sentanannyane.
2. Pawarisan nganutin pakulawargan kapurusa.

Pawos 85

1. Ahli waris sane patut ngwarisin inggih punika sentana purusa sane kaucap ahli waris utama.
2. Prade tan wenten sentana purusa kawarisin olih purusa pernah ngunggahang sakadi bapa, pekak, kumpi, buyut lan salanturnyane.
3. Prade tan wenten waris sakadi ring ajeng, patut kawarisin antuk purusa pernah kasamping sane pinih nampek pakuawargan ipun.
4. Prade taler tan wenten waris sakadi ring ajeng, kawastanin camput, kapatutang desa ngabenang pawaris, tur tetamian ipun munggah kedesa kaucap cecamputan.

Pawos 86

1. Sentana istri sadurunge marabi boya ahli waris, sake-wanten polih pahan kanggen pangupa jiwa, pahan ipun patuh ring pahan nyaman-nyaman ipun sane purusa, tan dados ngadol, makidihang taler sewosan sane marupa ngicalang warisan.
2. Prade riwekas sentana istri ring ajeng nglaksanayang pawiwahan ninggal kedaton utawi padem, pahan ipun kepah olih nyaman ipun sane purusa.

Pawos 87.

Swadarmaning ahli waris sane ngwarisin, kapatutang :

1. Nrima saha ngutsahayang tatamian pahan turunannyane ma-

kadi ngrempon sanggah, pura saha pangupekarannyane miwah nyelidihin ayah-ayahan pawaris.

2. Ngabenang pawaris saha ngalanturang upacara-upacara pi-
tra yadnya.
3. Naurin utang-utang pawaris saha manut pangelokika.

Pawos 88

1. Warisan kapatutang kepeah olih ahli waris prade sampun pawaris kabenang miwah kataurin buntas utang-utangnyane.
2. Pahan warisan punika kapatutang pada, nanging kautama-
yang babawosan sane kacumpuin ring ahli waris sami.
3. Ahli waris tan kapatutang polih pahan prade nilar ka-
witan lan sasananing agama, nilar kedaton, utawi alpaka
ring guru rupaka.

Pawos 89

Balu istri sane tan sentana rajeg, utawi balu lanang saking pawiwahan nyeburin sane pageh nglaksanayang swadarmaning balu, boya ahli waris, sakewanten wenang ngwasayang warisan rabin ipun sane sampun padem punika, tan wenang ngadol, makidihang taler sewosan sane marupa ngicalang warisan punika.

SARGA VI

Palet 1.
INDIK WICARA

Pawos 90.

1. Sane wenang mawosin makadi mutusang wicara ring desa inggih punika Prajuru/Bendesa Adat sinanggeh Kerta Desa ✓
2. Prade sang mawicara tan wenten cumpu ring pamutus Kerta Desa, kengin nunasang wicara inucap ring sang ngawewe-/nang.

Pawos 91.

1. Sahanan wicara mawiwit saluir sinanggeh nungkasin daging awig-awig miwah pararem, Prajuru/Bendesa Adat digelis mawosin tan nyantos pasadok.
2. Sajaba wicara ring ajeng, patut ngantosang pasadok sang nunas bawos.
3. Prajuru/Bendesa Adat pastika nyantunang iwang patut malarapan tri pramana miwah tan maren nepek ring catur dresta.

PALET 2
INDIK PEMIDANDA

Pawos 92.

1. Desa wenang niwakin pamidanda ring krama desa sane sisip, paniwakan inucap kalaksanayang antuk Prajuru/Bendesa Adat.

2. Pamidanda sane pacang katiwakang patut masor-singguh manut ring kasisipane.

Pawos 93.

Pamidanda sane wenten ring desa makadi ring sor :

1. Ayahan panukun kasisipan .
2. Danda artha .
3. Upakara panyangaskara .
4. Panikel-panikel.
5. Kanorayang .

Pawos 94.

1. Krama desa sane langkung ring tigang paruman nglantur tan nawur urunan miwah dedandan wenang keni rerampagan inggih punika kapatutang nyerahang barang-barang ipun ka desa tur Prajuru/Bendesa Adat pacang ngadol anggen muntasang utang-utang ipun ring Desa.
2. Desa Adat tan kapatutang nrima rerampagan antuk barang-barang sane patut inggilang manut agama miwah ngicalang/mademang pangupa jiwa sang keni rerampagan.
3. Prade sang keni rerampagan punika tan arsa nyerahang paderben ipun ka desa, patut kanorayang tur kasulurang manut pararem.

SARGA VII
NGUWAH-NGUWUHIN AWIG-AWIG

Pawos 95.

1. Nguwah-nguwuhin awig-awig Desa puniki kalaksanayang antuk paruman Desa.
2. Paruman indik nguwah-nguwuhin awig-awig puniki kamedalang antuk kalih pah tiga krama desa sami.
3. Pamuput bawos kadasarin antuk parasparos, sagalak sagilik saguluk, salunglung sabayantaka nanging yan tan prasida, kambil antuk akeh suara lintangan ring atenga.

Pawos 96.

1. Saluwiring sane durung kabawos sajeroning awig-awig puniki, pacang kasuratang ring pararem.
2. Saluwiring sane sampun wenten saderengnya patut kanutang ring sadaging awig-awig puniki.

SARGA VIII.

PAMUPUT

Pawos 97.


Awig-awig puniki kamargiang ngawit kararemin, duk :

Rahina : Buda Umanis
 Wuku : Prangbakat
 Sasih : Ketiga
 Pananggalan : Pingpat
 Isaka : 1917
 Pananggalan Masehi : 30 Agustus 1995
 Ring : Pura Desa, Desa Adat Banjar Bengkel

Saha kalingga tanganin olih Bendesa Adat kasarengin Kelihan-Kelihan Adat saksi-saksi lan pamikukuh manut kawenangan.

Luwir sang ngalingga tanganin :

BENDESA ADAT BANJAR BENGKEL ;




(I MADE KATON)

KELIHAN ADAT
 BANJAR BENGKEL
 DAJAN RURUNG :

KELIHAN ADAT
 BANJAR BENGKEL
 DELOD RURUNG :

KELIHAN ADAT
 TIREMAN :



(I WAYAN GURSANA)





(I WAYAN HARMA)




(I MADE SUATRA)

Saksi-saksi :

Kepala Dusun Banjar Bengkel :

 
(I MADE SANA)



Kepala Dusun Tirenan :

 
(I WAYAN WISANA, SH.)

Kepala Desa Antosari :

 
(I MADE PUDJA)

Camat Selamadeg :


 
(I WAYAN SUPARTHA, BA.)
NIP. 600004530.

KAWIKANIN OLIH :

Badan Pelaksana Pembina
Lembaga Adat Kabupaten
Daerah Tingkat II Tabanan :


(I MADE SUANDRA)

Parisada Hindu Dharma
Indonesia Kabupaten
Daerah Tingkat II Tabanan :


(DRS. I MADE SAMBA)

Kepala Kantor Departemen Agama
Kabupaten Daerah Tingkat II Tabanan :


(DRS. I MADE RADA LEGAWA)

MURDANING PAHIKUKUH
BUPATI KEPALA DAERAH TINGKAT II TABANAN


(I KOMANG WIJANA)

TIM PENYUSUN AWIG-AWIG
DESA ADAT BANJAR BENGKEL

Penasihat : Drs. I Nengah Sujana.

Ketua : I Nengah Sotia,SH.

Sekretaris : I Made Sumerta,SH.

Anggota : I Ketut Gida,SH.

Drs. I Wayan Suteja.

I Ketut Subaniantara,BA.

Editor : Drs. I Nengah Medera.